

**DISCOURS DE TEODOR AUBANEL, SENDI DE PROUVENÇO  
PRONOUNCIA DINS L'ASSEMBLADO GENERALO  
DE LA MANTENENÇO TENGUDO EN ARLE,  
LOU 29 DE DESEMBRE DE 1878**

A LA CIGALO  
MESSIES,

Grand gau sèmpe me fai de m'atrouva en vosto amistadouso em' inteligènto coumpagno. Siéu fièr d'avé de sòci tant valènt e tant voulountous pèr lou manefique prefa que se sian douna: la mantenènço puro de nosto antico lengo, l'enauramen de tóuti li glòri miejournalo.

La taulo felibrenco es bello, la taulo felibrenco es grand: li viéure soun ufanous, e li vin, li vièi vin de nòsti vigno morto, petejon dins li got. Aquí vènon s'asseta li dono encantarello e li pouèto ispira; li felibre, plen de pantai e d'estrambord, encian o jouïne, à-n-aquelo taulo oulimpiano an tóuti vint an: l'amour dóu bèu tremudo tóuti li front, tresporto tóuti lis amo!

Mai anés pas crèire que fuguen à taulo que pèr festeja e cansouneja? Sian à taulo peréu, segound la lèi e lou Cartabèu, pèr charra d'affaire, de nòstis affaire felibren.

Me languissiéu de vous acampa; car ço qu'ai à vous dire, me prusié de l'espandi.

Lou Felibrige es majour: vaqui vinto-cinq an que crèis au soulèu dóu bon Diéu; amerito d'èstre trata coume un fièr e bèu jouvènt, seriousamen, noublamen.

Quand sourtié di lagne, quand avié tout-bèu-just li pèd, e que courrié, ajoutui e mita-nus coume lis ange e lis amour, dins li draïou de Font-Segugno, e que brouncavo e cabussavo de-fes, pèr s'auboura'n risènt, chascun ie fasié bèu-bèu, lou prenié dins si bras e lou tintourlavo e lou poutounavo. Ero l'age paradisen alor, l'age fabulou: pageso e damisello lou bressavon sus si geinoun, e Mistral ie cantavo li premié Cant de Mirèio. Alor, se parlavo que d'espandimen e d'amistanço e de fraternita; i quatre vènt se sounavo de cambarado, e i'avié pas proun de man pèr sarra li man di nouvèu-vengu.